



Naib Canselor terima pengurniaan tauliah Kepten Kehormat PSSTLDM

Naib Canselor Universiti Malaysia Pahang (UMP), Profesor Dato' Dr. Daing Nasir Ibrahim dikurniakan tauliah Kepten Kehormat Pasukan Simpanan Sukarela Tentera Laut Di Raja Malaysia (PSSTLDM) berkuat kuasa 1 Jun 2010.

Dengan pengurniaan ini, beliau dilantik sebagai Komandan Pasukan Latihan Pegawai Simpanan (PALAPES) UMP yang baharu ditubuhkan pada tahun ini.

Dalam Majlis Pemakaian Pangkat ini juga, Profesor Dato' Dr. Daing Nasir turut menerima skrol Piagam Kehormat PSSTLDM yang disempurnakan oleh Panglima Tentera Laut, Tan Sri Abdul Aziz Jaafar di Markas Tentera Laut Kementerian Pertahanan Malaysia.

Majlis yang diadakan bersama pemakaian pangkat Pegawai-Pegawai Kanan Tetap TLDM ini dapat memberi kesempatan kepada pengurusan UMP untuk bertemu dan membina hubungan baik antara UMP dengan pihak TLDM.

Menurut Tan Sri Abdul Aziz, penglibatan mahasiswa dalam pasukan pegawai simpanan akan melatih bakal graduan menjadi pemimpin yang mempunyai disiplin yang tinggi bagi mencorak pimpinan masa depan.

Sementara itu, Profesor Dato' Dr. Daing Nasir berkata, dengan penubuhan pasukan Palapes Laut ini, UMP akan dapat mempelbagaikan pasukan badan beruniform serta memberi peluang kepada mahasiswa menabur khidmat bakti untuk Negara dengan menyertai pasukan latihan pegawai simpanan.

Pada masa ini, UMP mempunyai pasukan Kor Sukarelawan Polis Siswa Siswi (SUKSIS) dan Siswa Perkhidmatan Awam (SISPA).

Katanya, pelantikan ini akan menjadi pencetus dan peneraju perkembangan penubuhan Palapes dalam perkhidmatan Tentera Udara dan Tentera Darat pada masa akan datang di UMP.

Hadir sama, Timbalan Naib Canselor (Penyelidikan & Inovasi), Profesor Dato' Dr. Rosli Mohd. Yunus, Timbalan Naib Canselor (Akademik & Antarabangsa), Profesor Dr. Badhrulhisham Abd. Aziz, Pendaftar, Tuan Haji Mustafa Ibrahim, Bendahari, Zainuddin Othman dan Penolong Naib Canselor Jabatan Hal Ehwal Pelajar & Alumni, Profesor Dr. Yuserrie Zainuddin.

Lebih 100 pegawai TLDM termasuk barisan Laksamana dan pegawai tertinggi TLDM hadir meraikan majlis pentauliah ini.

